

Date – 15/07/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. School Education Minister Dr Vanlalhlana’n Zirna tihhmasawn nan zirtirtu insiamrem leh sem rual mek zel a ni a ti a. Sawrkar Zirna In tihchangtlun chu mi harsa zawkte tanpuina a nih thu a sawi.
- 2. Supply Minister Pu B. Lalchhanzova’n Mizoram chu lirnghing avanga chhiatna thlen palh theihna hmun a tam avangin in sakna Rod chu mi thiamte duan ang a tlin phak a tul tih a sawi.
- 3. US leh Iran inkara inepna boruak sang chho leh mek avangin India chuan Asia khawthlang lam thilthleng uluk takin a vil reng.
- 4. FIFA World Cup 2026 Semifinal inkhelah nizan khan Spain-in 2-1 a France hnehin final an lut

<><><>

EDUCATION MINISTER

School Education Minister Dr Vanlalhlana’n Zirna tihhmasawn nan zirtirtu insiamrem leh sem rual mek zel a ni a ti a. Sawrkar Zirna In tihchangtlun chu mi harsa zawkte tanpuina a nih thu a sawi.

Nimin khan School Education Minister Dr Vanlalhlana leh Sport Minister Pu Lalnghinglova Hmar te chuan Govt. Dawrpui Vengthar Middle School tlawhin tangkai zawka hman anih theih nan ‘Sport School’ a theih dan tur an enfiah a, hetah hian Education Minister Dr Vanlalhlana chuan sawrkar zirna in tihchangtlun chhoh mek ani tiin zirna ti hmasawn turin zirtirtu sem rual mek a ni a ti a, zirna ah hmasawnna nghet a awm theih nan zirtirtute leh khawthlang hruaitute thawhhopuiah a sawm a ni.

Sport Minister Pu Lalnghinglova Hmar pawhin thusawiin zirna leh infiamna kalkawp tir chu National Education Policy (NEP) 2020 thiltum pawimawh tak a ni a ti a, Govt. Dawrpui Vengthar Middle School chu zirlai an neih tlem avangin a building area chu sport nena kaikawpin ‘Sport School’ atan siam ni se tih chu khawthlang hruaitute nen rel ho tawh a ni a, Sport discipline thlan bikah inkhel thiamten an zirlai bahlah loa, infiamnaa hma an sawn theih nan Sport School chu siam tum a nih thu leh, zirtirtu awm sa leh sport discipline a zirtirtu thiam ber ber ten zirlaite an zirtir tur thu a sawi.

He sawihona hunah hian Sub-Divisional Education Officer (SDEO) Pi Carolyn Rinthanpuui, Govt. Dawrpui Vengthar Middle School zirtirtute leh Dawrpui Vengthar YMA leh Local Council hruaitute an tel a ni.

Govt. Dawrpui Vengthar Middle School-ah hian tun academic session-ah zirlai 23 an awm a, Pawl 5-ah zirlai pathum, pawl-6 leh pawl-7 ah zirlai pasarih ve ve leh pawl 8-ah zirlai paruk an awm a ni.

<><><>

INDIA AMBASSADOR TO NORWAY

Norway-a India Ambassador H.E. Gloria Gangte chuan Kristiansand hmuna India khua leh tui hrang hrangte a kawm.

India Ambassador leh India mite inkawmna hian inpumkhatna tha zawk, India hnam ziarang ropuizia phochhuahna leh India ram ropuina hrang hrang a pho lang a, naupangte leh zirlaite pawh Ambassador hian kawmin an thiamthil hrang hrang an entir a, India hnam tana an hmathlir hrang hrang te an sawiho a ni.

Ambassador H.E. Gloria Gangte in Kristiansand hmuna India mi te a hmuh hian India khua leh tui inpawh tlanna tha tak siamin thangthar lo awm zel tur tan entirna tha tak a siam a ni.

<><><>

FCS&CA MINISTER

Supply Minister Pu B. Lalchhanzova’n Mizoram chu lirnghing avanga chhiatna thlen palh theihna hmun a tam avangin in sakna Rod chu mi thiamte duan ang a tlin phak a tul tih a sawi.

Nimina a pisaa Mizorama rod size tlinglo zawrh thin tihtawp dan tur chungchang an sawihona ah he thu hi a sawi a, Mizoram chu lirnghing avanga chhiatna thlen theihna hmun tam tak a awm tih sawiin in sakna Rod hman chu a len zawng, a rih zawng leh a chak lamah mi thiamte duan ang a tling pha tur ani a ti a, Rod size tlinglo hmanga insak chu a himlo takzet tih a sawi.

Meeting chuan hmalak dan tur kawng hrang hrang relin Iron Rod zuartu company te hnenah Rod Size dik chauh Mizorama rawn la lut tura hriattirna leh vaukhanna ziaka pek ni se, an ti a. BIS te nena thawhhona tih chak ni se, Mizorama Rod Size diklo zuarte leh chutiang ti tura hma la tute zawng chhuak tura chak taka hmalak ni se tiin an rel a, Hriattirna tihchhuah hnua ti lui te chu Rod zuar an ni emaw, Rod company an ni emaw, an chungah hremna lek ngei ni se, tiin meeting chuan a rel a. Mipui te pawhin Rod man tlawm ringawt um loin, Rod Size dik leina chang hria se tiin hmalakna tur ruahmanna an siam a ni.

<><><>

PROJECT THAICHHAWNINU

Hmeichhe naupangte tana hamthatna tur ‘Project Thaichhawninu’ chu nimin khan Serchhip District ah hawn a ni.

Beti Bachao Beti Padhao flagship hnuiaia Women & Child Development Department leh Mizoram Postal Division tangkawp hmalakna, hmeichhe naupang hmakhAW ngaihtuahna, 'Project Thaichhawninu' chu Kawnpui VC Hall ah Serchhip District a kalpui turin nimin khan hawn a ni.

Serchhip District Women & Child Development District Program Officer Pi Lalthlamuani Rokhum chuan project chu hmeichhe naupang a bikin zirlai naupangte tan a pawimawh thu sawiin hemi hmang hian hmeichhe naupangten hma hun duhawm tak an neih ngei a beisei thu a sawi a. He project hmanga zirlai hmeichhe naupang sum lo khawlsak hi nakin zela Zirna sang zawk an zir huna puitu tha tak a nih dawn thu a sawi bawk a ni.

Project hming "Thaichhawninu" tih hi Mizo thawnthu Mauruangi leh Bingtaituki te atanga lak a ni a, he Project hian hmeichhe naupangte hmalam atan sum dahsak a, an zirna leh hmalam hun thlenga an tana tangkai tur a nih thu an nu leh pa te hriattir chu an tum a ni a, he project ah hian thla 10 chhungin kum 10 hnuailam hmeichhe naupang 4,050 te chu SSY scheme hman tir hman chu a tum a ni bawk a ni.

<><><>

SLAUGHTER HOUSE

AH&Vety department hnuiaia sa talhna - Slaughter House pahnihah chawhrualin thla tin ran 600 vel talh ziah ang a ni a; bawng talh an tam ber.

Nimin khan State Veterinary Polyclinic Hospital Conference Hall, Khatlaah AH&Vety department leh ICAR-NMRI, Hyderabad tangkawp chuan sa talhtute tan thianghlim taka sa talh dan leh man man zawka hralh theih dan inzirtirna "One day training on Hygenic meat production, meat safety and value addition technologies for Development of North-Eastern India" an buatsaih a; veterinary officer Dr Michael V Lalrinzuala chuan Aizawl khawpuia Slaughter House 2-ah thla tin ran 600 vel talh thin a nih thu a sawi.

Kan Correspondent Report ilo ngaithla ang u.

AH&Vety department Dr Michael V Lalrinzuala chuan Mualpuiah leh Bawngkawn Brigade-ah Slaughter House an neih thu a sawi a, slaughter house hmang tur hian sa talhtute chu an inzhiah luh a tul thu sawiin, tunah hian Mualpuiah sa talhtu mi 48 leh Brigade ah mi 6 an inziak lut a, ni tin ran 20 vel bakah Inrinnia zawrh turin Zirtawpni zanah ran 80 vel talh a ni thin, a ti a; bawng talh tam berin, sial leh lawi pawh an talh thin thu leh vawh erawh chu an talh meuh loh thu a sawi.

Ran talhtu inziaklut turte chu TB an vei leh vei loh endik thin a nih thu leh TB vei lote chiah ziah luh theih a nih thu te, rante pawh an hriselna dinhmun endikin, a hrisel lo deuhte chu Tuiriala sa leh a kaihhnawih bik bawlhhlawh paihna hmunah an paih thin thute a sawi bawk.

<><><>

DRUGS SEIZURE

Khawzawl Police te chuan nimin khan Champhai atanga Aizawl lam pan Eco Van pakhat atangin ruihhlo thahnem tak an man.

Khawzawl Tuisenphai Police Checkgate a duty te chuan nimin khan Champhai atanga Aizawl lam pan Eco Van chu umzuiin Tuichang lei bulah an nangching a, Police te man hmain Driver hnamdang erawh ramhnuaiah a tlanchhe hman a ni.

Police te hian Eco Van a chuang - Rinthianghlina (kum 26) Neihdawn leh Lalfakawma (kum 20) Myanmar te kut atangin Methamphetamine kg 4.723 leh Heroin gram 39 an mansak a, Khawzawl Police Station-ah thubuai iahluh nghal niin nimin vek khan Court turin Champhaiah hruai an ni.



MANIPUR

Manipur-a Kuki leh Naga-te inkara inhmuhthiam lohna thleng mekah kohhran hruaituten inremna a awm theih nan hma an la dawn.

Nimin khan Mizoram Kohhran Hruaitute Committee (MKHC) leh Nagaland Joint Christian Forum (NJCF) chuan Manipur-a Kuki leh Naga-te inkarah inremna a awm theih nan hmalakho an rel a ni.

Akashvani News Aizawl zawhna chhangin MKHC hruaitute chuan, Manipur-a Kuki leh Naga-te inkarah inremna a awm theih nana hma la turin Manipur leh Nagaland atangin ngenna an dawn thu an sawi a; ngenna an dawn angin vawiin khan Manipur leh Nagaland atangin kohhran hruaitute nen an inkawm thu leh neutral taka Mizoram leh Nagaland atanga kohhran hruaituten a tul anga hmalak an rel thu an sawi a; hmalak dan tur chu la ngaihtuah leh tur a nih thu an sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PUC BLOOD DONATION

Pachhunga University College NSS unit chuan nimin khan Civil Hospital, Aizawl tan thisen unit 158 an pe.

Blood donation camp hi Association for Voluntary Blood Donation ngenna anga huaihawt a ni a; PUC Seminar Hall-ah buatsaih niin, Aizawl Civil Hospital Blood

Centre-a thawkte'n kal chilhin thisen an la a, zirlai mipa 103 leh hmeichhia 55 ten thisen an pe a ni.

MZU hnuaia college-te'n kar liam ta July 10 khan academic session 2026-27 atan class an tan a, Aizawl Civil Hospital Blood Centre-in thisen an mamawhna a san avangin, Association for Voluntary Blood Donation (AVBD) ngenna angin PUC hian vawiin khan blood donation camp an buatsaih nghal a ni.

AVBD chuan, tunlai hian Civil Hospital, Aizawl Blood Bank-ah thisen pek khawm sa, a mamawhtu damlote'n an lak mai theih tur a tam lo hle tih an sawi a, Blood donation camp uar zel turin pawl hrang hrang an ngen a, lian tham lo deuh zawk pawha donation camp uar zel a tul thu sawiin mimal ang pawha thisen pek uar thar zel turin Mizoram mipui an sawm bawk.



STRAIT OF HORMUZ

US leh Iran inkara inepna boruak sang chho leh mek avangin India chuan Asia khawthlang lam thilthleng uluk takin a vil reng. Nimina New Delhi-a chanchinbumite kawmin Union Ministry of External Affairs thupuangtu Randhir Jaiswal chuan Strait of Hormuz-ah zalen leh him taka veivah theih chu India duh ber anih thu a sawi a.

Strait of Hormuz-a India lawng pahnih beih an ni chu India chuan na takin a dem thu a sawi a. Puan tawh angina MT Al Bahiyah leh MT Mombasa lawng chu nimin khan Strait of Hormuz-ah hian beih an ni a. He thilthleng avang hian New Delhi-a Iran Embassy Deputy Chief of Mission chu External Affairs Ministry chuan a ko nghal a. Iran palai hnenah hian thil thleng an dem thu sawrkar hotute chuan an hrilh a ni. Lawng pahnihah hian thawktu mi 46 awmin an zinga 30 chu India mi an ni a. Mi pakhat a thih bakah midang engemawzatin hliam an tuar bawk a ni.



FIFA WC 26

FIFA World Cup 2026 Semifinal inkhelah nizan khan Spain-in 2-0 a France hnehin final an lut. Spain tan hian Mikel Oyarzabal chuan minute 22 naah penalty hmangin goal hmasa a thun a. Minute 59 naah Spain tan Pedro Porro chuan goal hnihna a thun leh a ni. Kum 2010 World Cup-a an champion hnuaa Spain in final an luh leh hmasak ber a ni a. Final-ah zanin dar 12:30 inkhel tur England leh Argentina inkhela chak zawk an tum dawn a ni.

